

原輯南嶽志廿六卷

第三冊

南嶽志卷四

平江李元度原輯衡山

王香余
歐陽謙
校刊

形勝二

國朝王夫之南嶽賦結天元以紐靈圻陽治之鴻施母黃精之
函載炳相見於重離帝宅炎以誕命袞萬年而不辭是故其爲
狀也唯其爲象也爾其所自昉也爰其所自往也蟬延蔓挂輪
蚪蠖躩蜚戍騰拏龍睥鸞敞於五千里之外者獨不知其颺綿
之迢抵而匏繫之屢遷固有神亥逡巡而戒步燭陰睥睨而改
顏者矣乃循近趾蹤遠杭析柔埴東駢剛杳翠微隴夕陽幽蠻
泣掣兕狂別子汰委裘王杓勻櫛節逆迎順將拾幽絡阻逐景

飛光乍曲附於坤麓終回簫於兌方則亦有可得而形相者焉
原夫岷山之俶立也會昌建福絡啟大江盪滌東井襟帶峯鍾
是器術之所復穰而火正之所下降故其靈吭唳吸神瀟尾傾
條分萬岫形擢孤榮翠嶠翕葉嶄阨硤劼佚莠莠以田田集栩
栩以翳翳五指南纖而戍削三眉西嫵以娥嬪匪思存而稅駕
脈天紹以東榮於是濱若瀘跨馬湖謝錦水揖雲巫纏以酉澈
驂以鐔漚披紛夫夸趙桀都梁雖霧沓而星綴實振領而維綱
蓋不知其幾千里而翔集乎耶薑爾乃蒸水南夾清漣北款乍
紉崇崖或裹沙渾帛飛緒舒凌蹙煙緩迫然掣掇妥而淹蹇如
驚非意相忘以坦眩浮浮蔓垂棘鉤又歷條山撒裔水而後

乃抵乎其邱則有巨塊巖石積膚碧肌截爲列城覆以懸帷繁
星經曜閒以晃熠修鬣平茸雜以迷離桓午樊籞歛以洞達康
達互徑斂以崔嵬怒而犇觸旋以妖嫵已顧奔僕駭以顰鬢風
萍溼細散以詭狀欽然中起拔以崇魁奔精歛魄停凝矗峙者
則岫嶠爲之經始坡陀逶迤方伏以起互爾順衍驚踴旁徙尋
不周而發軔覩常羊以遙指僅標秀於七二紛餘峰之莫紀簇
紅華立白石啟小嵩亞太室開雙髻於玉女參石廩於麥積蜿
蜒蟠躍嶺賁蜴鸞複或僂佻單乃瘠猗翩駁娑其歸翰盤容與
而整翮薄經營於欒塢已緬邈乎臯宅張其華葢鬱爲煙霞蔚
劣峯歛天門噓呀披九閭邀日華神之嫵畱經過杳亭亭疑不

邪則安上芙蓉句磻龍從輔承顙附以奠祝融之封也其高也
拔乎原隰者九千六百步軒軒堯堯以捫銀漢而挂罡風玉衡
乳垂長沙岬從朱鳥翼覆天市作壙睨光下燭朱英上通孤碧
混霄返翠漾空維時蕤賓律御羲和轡永雲斂數絲宵涵萬頃
粵陟焉而步測有天末之焜烜維南極之樞星祝胡考於仁靜
彼徵瑞而乍炫此屆至而恆炳舍離合之神山誰共覲其光景
蓋其穹窿嶢嶢矯裊蕭騷詣空宛至出險將翺平揖太白俯勞
嵩高晒岱宗之臨深況恆祠之溢褒宜光怪之偉絕迴寒暑於
垌郊蘋末乍動焚輪已號鞶韞厯隕屢以馮總觸突漩復餘以
呦咬石級柔搖而閃霍鐵梁輕舉於鴻毛其或宿靄蠲明星晝

晨鷗凝寢夕蟲喧砌沈澹莫分海天無際賅金縷之綫興沓錦
浪之騰曳浴火鏡而踟躕奮晶宇以滌浼宛驚心而盪胸羌不
宣其綺麗何人間之未遑蹇遲遲其始霽至若繁雲興穴油陰
冒堊雷雨半山晴虛孤寫豐隆嬰啼列缺鐙炮浸升雲之連蜷
始霽歷乎趾下斯非睽影髣乎天人胡同堦而殊冶也哉祝融
是降衍爲赤帝之阜秀如摘以離羣矯欲流而終取其左則朝
陽日觀九仙潤牛昆盧之所蚴蟉也其後則雷祖九龍蓮花潛
聖妙高之所擁負也其左則南臺羅漢明月涌几之所舒紐也
其前則金紫流杯烏石莢華之所奔奏也其陰則荆紫大瀉迤
邐辟什暈旋乎暮雲之逢迎而態信乎岳麓之邂逅其外則湘

淥沫瀏矜回珮紉而憑隱乎雲陽之墟以挹注乎敷淺之藪其
南則石鼓回雁碧雲雨母鶚峙鵠臚椒聊瓜剖以犇息乎海嶠
之列五與夫瀟山之疑九回薄磅礴團團結複控扶來廷少長
維族豈後至之或凶匪撻彼而臣僕傲紫蓋之不甯終同區而
必穆唯猊奔以驚舉奄靈徠以載謾棲赤燁之感生儼司天之
帝服懲祀典之不經選祝誦以宜穀神眇眇以蜎蜎粉遲下而
流睴時則常伯夙請秩宗宵寅發策明堂降甌端門清酒旣薦
制帛維纁驛駕馳道有來湘干蒲鐘曩發鳳吹清喧燎飄光以
乍晦香屯煙而徐磨降炎精之融煇貽君子以芳荃勤九伐而
不匱匪明德其已諛迺至南陸迎日元辛涓吉后有事於方澤

差名山以作匹赫炎光之顯祇壇六成而列秩雖迨眊乎上公
實王禋之載謐瓚築鬱之醇醑鼎剛駢之繭栗誠高朗以令終
作后祇之承弼彼燠乾封而號萬歲已啟俶豔而替昭質奚況
亭亭云云之部婁浮七十二候之雄心者曾何足泚右史之彤
筆耶德馨維瑞靈貺斯徵護軒轅之瓊璽罪寶露而飴凝攬寒
暉於夕館帝縑綵以宵興賚羣后以滌目宛縈帶於蓬瀛降湘
妃於北渚賓朱鳳於南陵迨夏后之齋寤冀通精以澹災畀金
簡之雲籀謁蒼水之靈魄瀾滔天而無朕粲絲理於奇賅苟神
笈之終吝眷羽淵而增哀敷隨刊於土乂訖效享夫黃能虞遂
陟而覲后搢元玉曰兪哉黃壚敦膏紅泉釀溜英英九丹煜煜

三秀鷦明乳雛應龍伏蔭叔夜浩歎於林岡宏景徘徊於句岫
故有山經窮其削梯渭上罔其占繇者矣迺其什一千百猶可
得而究焉其草則有黃精少辛芎藭射干幽蘭菰苈芍藥芳荃
苦葳甘菊蘘茅香蘭蘘冬紫茜沙蔕白前昌歆九節龍鬚纏綿
竹紀千齡松壽萬年青蘋虎掌蘼蕪旱蓮禹餘糧威靈名仙
交藤烏首翁草華顛薺薺薯蕷冰臺竊衣五加羨玉百合胎璣
綠覆春皋芳泣夕暉藹風送薰醺醺醺醺積雪吐蕈方暄擢薇
叢點山椒弱暎水湄其木則有檟桂厚朴榛椽含桃丹楓英梅
梓樞杉栢徑松接武微風振濤銀杏山礬黃心碧梢木蓮六出
暈紫斲瑤芬薰百尋豔蕩九皋扶條逼上擢挺危牢援猗磬折

柔途錫膏痼瘡籛條虬文曲麤螺旋乳結盤渦糞尻雅宜曲几
或便詩瓢巨竹繁生細篠側出大任汲炊直中穀率密箐雲遏
修篁風謐駘蕩蘿靡檀欒蕭瑟晚茗早薜屑雲蔽日紫筍綠槍
鹿茸荷蕊迺令又新品泉鴻漸浣瓊吹松風瀹海眼祛孝先之
便便罷伯倫之荷鏹視天池之與顧渚亦可登洙泗之狂簡也
其泉則有金沙娑羅貫道水簾龍池洗衲虎跑三潭春草載榮
石髓飛甘澄涵霜月清混鬱藍拂阪陵磧懸珠鏗吟偶拽屑其
喁噢旋辱問以崩坍振鼉吼之齎齎幽蛩泣其淫淫警達旦以
允豫寄清怨於江潯其巖岫則詰軋綢繆鉞挺弓彊始乎纖屈
終乎廣哀蹇產帶翳疑墜稍收稜層磕沓敦愷礪犢檻泉沸射

雜以譴謗千章蔽日則禺中警夜叢筍留霜則暄和懷秋沓扳
捫之絕迹誰丁丁而見求閼鳥徑以太古藏內趾之與芻荇其
獸則有蔚豹文狸獨援歧雌駟駢山都豪豕刺蝟麀鹿封豨麋
麇兕羣麝父王孫蛩蛩狒狒吟鼯嘯狐清宵吹沸跂息騷駭趕
越憤毅度夕樾之與朝陽坦不憂夫羅罟其鳥則有素鵬白練
山鷄吐綬睨睨鷲啼鉤輈雉倒挂鷺雀海青鷹鷲鴟鷂鷓鴣
望巒斯就白展素沙丹欺絺繡莫不矜羽弄魂歡春錦晝盼蘭
芽以低啄掠飛雲而橫逐其殊異則雨虎晴見而陰合雲師霽
出而霧騰絕礪閃夜光之木懸崖炬聖者之鎧靈臺浴春而釀
雪神蜥弄水以飛冰思匪夷而恍惚直不信其已曾迹其昭爽

之壤絕壘其滂沛之勃蒸自非象外棲心天徒合契瑩秦鏡於
密勿覓軒珠於遼戾固有望景而腸迷臨高而神閉者矣琳宮
丹館依限附巔豐碑隆碣冠阜臨泉樾觀月清石梁虹懸飛航
切雲高臺含煙則有巨公經過而磨崖逸民忘反以閉關墨卿
韻畱於金石瑟客曲寫其猗蘭其戾止也拓內美浣塵慮披天
宇益修度心謀籟通目擊道遇昌黎恣七諫之遊考亭伫三益
之素扶桑旦擢於雲中縞練夜消於天步指蒼天而予正何美
人之遲暮崇仁坑疏而霧隱廣漢作牧而星聚東廓函丈而英
延甘泉尸祝而芳駐咀德華漱仁津衍河雒藝邱墳樹旌幟翦
荆榛匪西河之疑似樂寧壇之佳辰近則荆溪制相堵公仲緘江陵

詹尹

張公別山

拂車轍於層巒觀初瞰之輪囷拊劍而義魄增振衣

而烈心引濱九死以崔嵬拯皇輿之遘閔若夫杜陵西崑香山
淮海之續風而接軫者取青妃白激商諧羽於其閒誠無情而
不盡至如王孫憤俗而埋跡高士問津而行藥子野罷遂以流
觀少文展圖而棲薄鄴侯避李而挂冠致堂卻檜而躡屩忠誠
旁求而鵲起黃門經始而鳥革諒卜吉於允臧抑降神其維嶽
矧夫銀地表瑞朱陟通真釋子彌天羽客乘雲九仙霄舉隻鶴
霞寶鳥爪翻書石糧自餽嬾殘飯芋巖老長醺扣玉壺於海客
奏雲璈於華存含此薑於金母養釘鉸之胎魂雲輶來其宛在
晒探島之徒勤逮其三車東駕五葉南開頭陀既景思大爰來

海遷蛟館顚觀天台鑲磨石鏡遷滑莓苔慈明狎虎芭蕉浴雷
綠蘿結菴露滅名齋丹霞鹿門金輪南臺息勞山之戍客踵紫
柏以鉗椎其蠖伏而鸞舉也蓋不給於更數光參帝網威震毒
鼓位揀君臣要兼賓主儼華藏之莊嚴尙何論夫雙樹以故金
碧瓏珎堵宰穹崇比岫聯香接宇聞鐘花雨成蹊白雲在封埒
石聽於道生擬鳥供於嬾融苟息心於元悟豈來者之末工雖
畫一於鄒魯展道大而必容要非包沕穆析鴻濛遴眾妙之所
都建萬壑以道宗則夫瀕洞漁養攢合龍蔥者胡憑藉焉以孕
大觀於無窮也與是故其爲輿區也脈蜀踞楚控粵引吳北吞
甌阨南揜蒼梧顧陽雲而掉臂何台蕩之與匡廬浮洞庭綰瀛

潛帶瀟湘向背殊煌煌唐唐跼蹐首出以參伍乎鄣都距北戒
而絡漢廣紀南條以挂天樞道靡崇而莫奠功維夷而不渝皇
哉有虞氏之慶也肆見羣后孟夏徂征爰服三苗迺敘南衡玉
輅匪勞荆土載寶五圭儼帛一死二生誠无妄而苟薦辟奔走
以載盈眄自他其匪稱格帝享於斗精渺江介而遙履作百王
之典程羸氏亂紀漢德中涼割長沙以建芮隘幅員於朱方濟
三江其已惴矧雲夢之可航侈濞霍而僭號躋小星以專房羌
恣瀝於脂轄詎苾芬之能饗於戲陰禮陽樂徵皇王之質軌者
豈不偉與抑斂福之豐儉帝睠焉而以篤其棐也是以樂慙綴
促禮樸者俗鬼邈虞漢於霄淵互善敗其凡幾緬喬岳而揆明

禋繼皇嫡其孰躋懷江永於比興髣南風於博依簡明德於炎
精溢余思於有斐頌曰明明后昨來昌釐真人南翔翔陽維北
漢沮漳南湘灘中合穹嶽雲葳蕤烝哉我皇誕應之萬壽百祿
重離明秩正川麓靈怡情報哉不遐朱鳳鳴綏我曾孫宅荆京
靖興肇允夷與庚業業不傾補天石賚予金簡遷禹迹帝錫元
圭嶽之績蕩滌川原帝皇驛駿發炎光庶昕夕輝輝云云岳精
來陵嵩泰華恆若敦蒲姚安姒企相陪迺眷南顧曰念哉王衡
賁光天門開

易貞吉南嶽七十二峰賦維南有嶽九面瀟湘星分長沙之軫
宿度應玉衡於瑤光爲炎方之巨鎮實南紀之重防七十二峰

之羅列八百餘里之延長泰華無其聳秀嵩恆遜其修張先王
巡狩之地宋儒講學之堂固非同空山之丹崖青壁虛庭之月
榭星房也則有湘南野史世外遺民有濟勝之雅具極步履之
追尋既峰峰之遊遍可一一而指陳爾乃登祝融之絕頂爲衡
嶽之主山高則九千餘丈之峻極路則三十餘里之曲蟠迎暄
而望朝日之晷品水而酌太陽之泉風洞之雌雄各異雷池之
雨電無邊以及天柱競秀於霄漢煙霞縹緲於雲端紫蓋迴翔
於東北石廩高矗於西南芙蓉當風而秀發蓮花過雨而朝含
碧雲之翠黛如染巾紫之春花若丹惠日明月之照耀白雲曉
霞之清鮮採霞喜陽之光彩紅花碧蘿之芊妍伏象含珠之石